

鹿
裘
石
室
集

鹿裘石室集卷第二十四

宣城梅鼎祚禹金著

文

祭文

祭朱封公

翳沛國之汪澤而澶洄沸潰兮于瑞之陽衍神
明而遙溯兮令聞孔章承嘉禾之哦松兮無負
丞也良維公則抗跡以貞幽兮占龍潛而指鴻
鵠獨蒿目以憂當世兮紛信信其昌被殖砥柱

于波流兮嚴屋漏于爾室

叶

體曾閔之至孝兮

順繼慈而撫女娣養五鼎而承顏兮斥百兩而有儷嗟季季之短折兮翼遺孤於呱呱化荆榛爲蘭茝兮力穡事而祝汙邪內行旣淳且備兮德音不遐王彥方之格非爲政于里陳太丘之道廣以御于家毓麀趾之振振兮薦于王園筮李吾宛陵兮恢至理而在宥操三尺以平反兮典兩試于薪樞

帝曰俞厥爲朕司耳目兮冠

神羊而端陞右瞻東南之天府兮埒豐鎬于畱

京有權勛之怙寵今久負隅而莫撓振霜威於
一簡兮回天聽於九闈貴戚相戒而斂手兮
避驄馬之行行粵主明則臣直今亦謂有是
父有是子風必昉于閨門兮推聖善于母氏式
雞鳴而將燉兮和熊丸已勞止譽命之並煌煌
兮頌魯侯之燕喜依丹青而長價引白雲而寄
思俄聞方而就養詎有盡之易期胡德星之寢
曜而娥月之藏輝恍簫玉之並駕陟岷岵以何
時噫嘻傷哉寧彼蒼之不仁兮痛吾師之降割

雖百身其曷贖兮冀千秋之未沫聊絮酒而束芻兮拜搏膺而泣血靈上下其焉如今將逍遙乎而騷漻汙

祭盧封君

嗚呼古制有之父教之忠子則能仕古語有之不知其父但視其子參墟在望斗躔分晷曷式公間遙承逸軌粵予秉麾牧茲宛水首善爲宣茂宰在理朝焉夕焉之綱之紀或佛我違或象我指一體相維列城所履遡海先河咸推攸自

義方是崇以燕翼爾豈惟茲士庶嘉惠之卽予
亦恭止不久就于官而安于里出不張蓋入不
重簋蓋外將以養子之廉而內欲以沖焉養已
皇封有禔九命伊始胡賀者方及門而弔者已
戶倚昔嵬然爲民長者今儼然稱孤向之謳誦
歌吟者皆扶服嗟咨而轉飲涕爲之誅豈惟茲
士庶若一旦驟奪之卽予亦若處者之失左右
手而耦行者之喪其侶亦旣念止嗚呼胤則高
陽德則畏壘名則煥爲綸言壽則逾乎指使

公其籥白雲而乘飈輪下眠去濁世也猶脫屣
有薦不腆有詞不斐公其得無以怛吾化而何
子之不達也以見鄙或庶幾其格只

祭大銀臺陵陽徐公

猗與噫嘻 皇造懿鑠以貺我公恢發用裕昭
明有融燦茲熙運升自公宮桓桓司馬畱樞職
雄奉諱稱疚旣禪言邁畀爾祥刑亦方無害白
重英英風被南介七閩隩區雙旌倣載莆海沸
滴胥溺島夷創痍未起恩斯勤斯乃眷西顧梁

牧是司神以降福民以宣慈回翔藩臬于越于
雒彼曾不庭挺險靡莫天討丕張專征方嶽餽
饗致師前籌畫諾帝嘉庥烈增俸賚金誕賜
之履滄岱式臨多方訓士相景咎形岑樓仰泰
斗匡應星卿序陪畿閱勞薦晉祿臣司光優游
諷詠俾作訥言出入朕命翼亮爰咨威顏在覲
何居平方興械櫜遽集荆榛西人伏莽東事批
根大臣之義抗節引身臣心如水主德如春
望里則趨循墻而走處豐能約孺和且厚彼或

麥譚而公杜口彼或厝規而公斂手凡公所建
不言躬行篤我邦族示我軌程嚴之惇史薦之
王庭尚企纁壁終求老成司冠維時歸徠白下
歛墳穌箎魚魚雅雅蒼珮朱輪列戟行馬二老
三事香山洛社天刑已弛日飲無苛伊其笑粲
矢也寤歌厥蕃美子孫曾駢羅標鮮韶令瑤樹
瓊柯猗歟噫嘻出與處咸俯何仰而得全全昌
燕貽貽穀大耋逾登期願考卜夫詎以濁界難
常清都旋復噫吁嘻榮哀備摯 國典具敦易

名歔卹赫其資存公所克享於胡不臻公所弗
究延於后昆越鼎無似夙叅世講申以因嬋進
之吾黨憶侍燕閒驩泳流賞解衿沃觥降尊及
長嗚呼恫哉初聞示疾共祝豫康嗣傳逮革奔
問徊徨予猶私戚衆益交傷神理不沫典刑則
亾感栗以風祖遷有日噉焉爲涕嗒焉若失肅
御靈修庶歆芬苾宛水陵峰澄波立壁

祭沈肖林

嗚呼長公繇胄子仕歷承至半刺父侍御而弟

太史子且爲牧伯爲閫帥餘及孫咸被青衿攻
縹帙不爲非遇矣而人猶齎咨慨噫以爲遇公
自偶得之而位終不副才也長公宦轍所至皆
廉敏有聲先後薦于朝居又不有其父若弟
與子之貴而孝友稱于家敦睦施于里亦庶乎
永終譽矣人顧猶齎咨慨噫以爲名不走四遠
終不副實也長公年躋七十視履鮮健封大夫
之壘書煌煌臨門矣可不謂壽而臧耶而人
猶齎咨慨噫以爲勤上善而畫中壽年不副德

也夫卽公所享固宜恒內足夷然長往矣廼其
咨嘅追惜不足者在人則以長公有餘也士君
子修身行已當使其有餘而所享寧處其不足
蓋足則無餘矣況長公亦何所不足邪人見謂
不足耳然此衆人也若鼎祚與長公則由先太
中以來講世有年矣鼎父事侍御而長公伯仲
嘗弟畜鼎祚者也對宇望衡拜母見子世所謂
異姓而骨肉者誠有之則今鼎祚之盡然以傷
潛然以涕自倍人人者情也仲公先公往者二

十餘年而公今復往所接多少達所構多咤聞
諺有之物惟新人惟舊如是而予之傷以涕賦
懷舊而感惜誓也其情又百倍人人矣嗚呼時
節不居祖載有期北風淒兮當長別離一卮之
薦公其下格我而小啐之嗚呼噫嘻宛句在斯
托微波以通辭

祭屈封君

噫嘻湯湯江漢世載其靈烝湘潰濱而挺喆人
潛龍勿用貽燕在庭逖哉孔邇濁以徐清玉韞

山輝珠藏川媚出雲開先懷庚顯异爲國所需
惟天所畀魁台應衡鼎呂攸寄三仕爲李豫粵
暨宣呼吸定變罔敢卽頑以龕以撫安于泰山
盤根錯節歷試諸艱處公如家視民如子溫兮
陽春澹兮止水法始貴行文寧輕比凡我畿南
祥刑勅紀咸推所自祝海先河芝綸寵渥綵
舞婆娑湘蘭佩馥楚醴顏酡爰康以考旣孺且
龠胡不憇遺遽乘大化賜杖虛朝壑舟藏夜
僊僊乎歸颺輪蜚駕饋醕無從著龜永謝眇茲

方牒堇典諸曹二天蒙庇九地非遙失恃失怙
是噉是啖薄陳明水敬寫大招

祭楊封君

噫嘻湯湯八流鎮以太華徙號常安厥聲爲夏
繡斧我臨行驄在駕志畏德威恩宣道化吏虎
而冠綬解焱行民鶉而衣纊挾春溫士風斯下
禮義是敦兵日以頓步伐是申凡茲秦隴咸蒙
覆露揆厥所繇封公焉怙能仕教忠惟懃成姬
爲箕則良式轂于度矯首遙祝祝海先河我公

康爵朱顏喜酖有歌衍衍有舞傴僂 王綸舄
奕鸞亭豸戕篤祐嗣君以終我惠正色立 朝
孝思錫類九列薦登 三命旋馳何者縞衣來
西告諱西人扶服涕雪如縻二天缺望九地曷
追公誠隆貴尚格台司公誠遐耆猶阻期願嗚
呼人羨其外未闕其裏昔子郎潛公不氣靡及
子臺遷公不色喜願爲清郎爲真御史某不佞
忝與令子聯舉南宮各剖令符異壤殊風栢烏
之選復躡芳蹤繼且我莅我帡我幪吾翁若翁

彼長我長誼切弟昆情釣疴癢絮酒陳詞煮蒿
悽愴哀繞蒲中守羈江上

祭顏贈君暨孟太孺人

嗚呼粵昔顏孟統紹聖真洙泗潰衍于宛陵
爰天作合匪人曷因金波聯曜玉鏡齊瑩猗與
顏公世高隱行近市無囂處脂非潤叔子貞操
弘都友敬藻鑑人倫鄉閭表正猗與孟母特秉
中規矜槃佩誠椎縞來儀我負子戴勤斯渥斯
惠慈允著左右咸宜兩美難常雙形忽析寡鵠

興哀啼烏含泣矢死靡他撫孤唯力是用劼劼
葆乂家室敎明沃土隣遷學宮俎豆揖讓綽有
儒風蹁躑三鳳天矯一龍出宰民社入啓皇
聰青瑣夕郎白門天闕望肅留京疏傳朝列
抗引直臣臣甘隕越帝度如天寬恩薄謫子
之忠仕父則敎之亦曰聖善母氏我師綸音
有暉庸報厥私歿榮贈秩生賁封貤供甘備旨
吹埴和簾嗚呼母耄捐養公疆無祿知始作成
詒謀惟穀講世釣情令聞永淑醴酒蔬茹靈昭

穆穆

祭唐伯丈翁母合殯

嗚呼謂天道而有知乎吾以視翁母不然也謂天道而無知乎吾以視翁母不然也然則天之于翁若母其殆在有無之間乎翁與嘉議公皆少孤嘉議且遺腹子也起家南宮郎吏部以薦陟觀察貴矣而翁與母棟家政者五十餘年凡五十餘年中外無苞苴之入內無筐篋之私及嘉議以西粵終而子長者董就傅少亦遺腹子

翁與母撫而教之如其子也夫初不以弟貴而
執有加旣不以弟歿而愛有別非盛德人耶迺
晚得一子復有孫而竟前後殤以夭斬然血胤
也嗟嗟尚可謂有天道乎夫爲天所阨而衆乃
盡焉爲嗟咨慨愴還以責之天則其人不可知
耶顧今嗣翁者嘉議之遺腹子也肩其兄爲名
士立致顯親矣女之子成宅相矣翁母並生踰
七秩則旣有年矣廉讓達于鄉爲惇史慈儉施
于壺爲母儀則又有名矣堪巖之士名不可倖

集而司命有權年不可力請也抑安得概謂天道無知乎要之天久終自定此吾所謂在有無之間者定論爾鼎小子婿于嘉議婦先二子孤多育於翁母則猶有私惠焉以故知翁母特詳茲以黃鍾之月奉二喪就窆矣則余猶腐心雪涕若初喪然固非無從也嗚呼敬亭蒼蒼宛水湯湯阻山帶河負陰抱陽禪墩永闕玄扃是藏式封馬鬣佇賁 龍章噫吁嘻日行北陸陽七日而方來復天幽東嶽魂一逝而靡還期陳楚

瀝而歌哀些冀巫咸其下招之嗚呼哀哉

祭董太公

嗟夫夫英雄魁杰之于世猶鵠然一搏不中
則翩然高逝焉其侘傺亾聊之意必托之文辭
以圖垂不朽其儻慕莫羈之才必奮而譚兵以
敵古霸王之略此其人豈汶汶與閭巷浮沈而
已楚劍之利名天下至若讀丘墳而變騷賦皆
自管豔稱之吳楚交綏之國也則嘗聞楚有董
太公者矣太公故著聲鄉校不售輒謝諸生業

而治古工詩又以詩無益世遂講于握奇飛鈴
曰誰能去兵比年東抹樂浪西討播酋亦不謂
無兵端矣太公以世能用我而不能盡我竟不
出日且潛冥歷數撰記內典嗟夫楚雖有才亦
何所用哉及我令公舉高第分宛陵之符咸噴
噴太公有子足紹其志發舒其遺緼也周公旦
待魯公三年而報政廼太公年莖艾遽溘爾卽
世耶令公之政于宣數月耳周敏寬惠宣人士
蓋饗其利焉願以觀德化之成則靡不爲太公

祝自縞衣之儵來也皇皇焉如有求而弗得又孰不爲太公蠹焉傷蓋宣人士之惟令是怙猶令公之惟公是怙也今則兩失其怙矣或太公風攻詩以刻劘其性靈抑所爲不盡用于世者終不能無扼腕耶嗟夫若太公者風韻節槩旣振連一時而子材且顯負公輔之器備者具矣復安問年予小子輩醴不勝楚之瀝而詞不勝楚之些然皆承造于令公趨衰助紓要非涕之無從者公其無吐我而泠泠一下僊馭乎

祭葉文光大叅

嗚呼公蚤慧而晚達內郎清曹外叅劇省亦不謂非顯融矣而衆猶以爲位不副材公白晳而澤當非壽者相迺竟登七秩生無疾患去無苦惱亦不謂非壽考矣而衆猶以爲年不酌德公宦轍所至有循聲里門所過有馴行亦不謂非令聞矣而衆猶以爲名不實實公之子若孫勅身富學卽青雲可立致而猶未逮公壘魏公之笏隔紀亮之屏也則衆以爲報不符施嗚呼士

大夫之官爵財賄莫患于已常不足而觀者有
餘彼其見謂有餘者正我所爲不足者也嗚呼
六計之弊必先稱廉卽南中忌者能掇拾繆悠
而不敢加公氷檠之守以爲汙士論鄉耳卽言
者能刺促官中碎事而不敢誣公桑梓之敬以
爲恣夫君子之道或出或處公出則廉吏處則
惇史存則順事歿則全軼固宜公之凌雲一笑
矣嗚呼公之少而從游先大夫于志學書院也
先人嘗稱之耿恭簡羅盱江此載道之器故今

第知公長厚以爲性生而行純備或于道偶合
不知其實本於學者多也嗚呼學何負于人而
數十年間翹材廢爲馬廐講肆化爲豚囿三先
生之風流日邈公又卽世長往矣道世交喪江
河愈趨後來者抑安所放而未死者安所仰乎
予鼎祚之哭公涕蘇蘇不已也夫詎以吾私而
已嗚呼杯酒澹淡然若有臨之者其公領予之
言非溢美庶爲知己邪哀哉

祭麻太僕公

嗟夫嗟夫夫仕宦內外惟所適爾而議率重內
當公之繇銓郎出叅冀南也以持選忤政府舉
朝爲之不平其後臺臣撫以論出公者 天子
至赫然震怒削其籍則公之所爲內重而繫公
議若此人生則貴爾死率鮮聞且藩臬不槩得
卹典也及公之遷右方伯以歿也士大夫咸悼
厥衷而晉之役臺臣以清苦藩臣聞 天子至
怛然愍錄特舉異數賜冏卿之贈則公之所爲
外重而死也哀若此夫廉者多刻故廉而不刻

稱焉公自銓歷藩用廉表見矣然意實寬平務
長厚彼置身汙瀆而藉摘發以文姦則耻不爲
也正直者多矯亢公嘗有大臣相蒙主上孤
立之疏矣佗操論行政類不肯媼阿顧逡逡躬
行呐呐不出口彼挺焉守勝以爲節槩而皦焉
急人知則耻不爲也然此特在朝言朝耳余鄉
人也請言鄉鄉多毖飭于守官而放辟于居里
以吏課所不逮也公無私交無公謁卽一飮不
妄過片刺不易投陳學臺言之六年之間十四

郡之內絕無干請者麻公一人嗚呼公何以得此聲當路哉余姊爲公丘嫂而公之女適余子因習其家世請言家公事嫂如母仲才而托于酒必委以承驪母嫡以七十考終也言及輒唏噓追慕之於族爲尊行然恒言不稱老族亦不知其貴人嗟夫世多諱庶息而以父爲虎兄爲狼者又何人哉嗚呼公內則內重外則外重雖忌公者終不能斂已定之國是公位不列上卿年不登中壽一子儁朗復以天雖贊公者終不

能挽未定之天心嗚呼疇不尚名榮名不及令
名疇不尚年小年不及大年公宜爽然自釋矣
吾儒誦法孔子鯉之死伋九齡耳于回于由而
曰天喪予天祝予若鯉則不聞援天以爲解聖
賢處此抑必有道焉公兩孫長者齡漸及伋幼
且頭角漸露也公子婦貞而順諸姪義可托孤
也以公之靈尚陰隲此杜纖介之萌錫寧壹之
福食之教之而昌而熾以償公未盡之年享公
未報之德要此非外戚之敢預圖固亦有識者

之幾幾大願乎嗟夫身命何極神理常存邈矣
河山杯酒起黃壚之慨黯焉冠劍 綸言賁玄
壤之文感蓬鬢其成霜悲來歲遑望麻衣之映
雪歌去露晞嗚呼茲日不腆之薦誠長別矣從
永訣矣神之格矣若沒若滅矣其乘箕尾而揭
日月矣

祭徐丹陽別駕

噫嘻昔者鄒枚長卿杖策游梁公叅藩幄在汴
之陽彼猶托乘徒富詞章旬宣茂勩是贊是襄

稚川崇玄請藥勾漏公倅辰州靈砂丹潛彼猶
偏奇而公精究爲心經故不淨不垢身中有寶
教外別傳殆於二氏庶舉其全公嘗屬予子曷
序焉逡循未報負此成言歌康南楚主計西鄙
歸樂泌衡表正鄉里卿月相輝謂公難弟德星
奏聚謂公有子噫嘻言者浮物名者實賓此皆
應跡非公之真七十逞矣翩翩上征衆廼羣噉
豈杓之人予輩少小周還綢繆姻婭竊附知公
何敢怛化所未懷然老成凋謝薄陳雲漿暫紆

飈駕噫吁嘻

祭金封君暨劉太夫人

嗚呼爲貴達之親也易爲聖賢之親也難爲子而欲榮其親爲貴達之親也易爲子而欲尊其親爲聖賢之親也難彼貴達類可以資適逢世而得之天幸聖賢之徒則未可以獵躋其域而貌窺其藩斯固季末之希覲而士君子之克難者也於惟太公受姓稔侯爰妃太母演胙炎劉亦旣出自貴種德紹世求矣隱操貞履儷美考

祥是謂天作之合而人厥永孚于庥挺生府君
發跡登庸誕竑文命肆業昭融令而彊項則巨
璫戢暴郎而度支則嘉量允中牧我六邑暖若
春陽容被者皆振衿以就日憲我六郡凜如冰
雪苛墨者皆解綬于望風方祝二人之番番衍
衍俾府君以終惠畿甸忽中達而改轍曰吾一
日之養不以易三公噫嘻此誠偉人名賢之作
用然特其緒餘以治家國耳歆然穆然不以介
諸胸夫始焉于學有必爲聖人之志原本鄒魯

私淑東越之一脉于盱江猶獨得其宗蓋古者
無不說學故雖大夫之主尚能訓子以備於造
化度於法與禮而子之能仕則父教之忠至于
伊洛之理學興也有善迪之太中以啟二程有
善養之尹母以啓和靖抑將無追鄴人之懿躅
而三遷以漸化之芳蹤夫子爲百世之師者親
必爲百世之親是尊是崇以遺令名于無窮矧
若我太公太母者又養兼百祿之荷而寵拜
三錫之封大耄並臻清明在躬公孫之振振詵

詵者亦靡不從奮華渙藻以肇餽于學宮以是
占其後之必大以豐是其純祐所篤孰如我二
人之丕顯而孝思維則孰有如府君之具隆者
乎鼎小子講世亶厚承諱茹悲遡媯都而眴涕
酌江水而噉詞若夫置生芻于謁隧歌露薤以
引綏衰云及矣遠莫致之惟靈其庶茲念存而
歆格于斯

祭劉東溪

嗚呼無已者人生之恒情而有涯者天運之定

數缺陷者世界之偏域而得全者至人之竑度
大年期頤公且登耄實由傳以合天造選自成
均試政于婺暇則哦松丞也曷負多子象賢家
珍國器伯儒早殞孫謀善締華萼相輝墳簞迭
奏番番皤髮若若黃綬有妹有女亦皆七袞穆
穆雝雝俯仰咸適豈郡望遠紹于彭錢而壽星
近見于南紀故金庭爲不死之鄉玉山乃長生
之里無射之月微疾見示聞誕曾孫喜耀往視
試啼知英摩頂小貴兆啓雲仍況出伯喬夫若

公者誠爲得全矣而閭里嫺戚猶咨咨噫噫焉以爲未盡則以人情之無已而未亮夫天心之有定公茲必凌雲一笑而吾之酒是啐吾詞之是聽也乎嗚呼

七日奠先太中大夫文

嗚呼痛哉嗚呼痛哉吾父棄不肖孤七日矣一陽之月七日來復吾父之一往也其可復耶其長往而不可復耶嗚呼痛哉吾父亮直之誼著于諫垣廉白之操顯于牧郡菁藻之稱擅于眎

學終始之節全于疏歸張正鵠以約衆趨植砥
柱以障流俗是宜饗有遐紀登在上壽也而堇
堇止此邪嗚呼痛哉今林林而總總者孰非父
子哉而吾父闔門養重孤不敢事請謁矣吾父
清儉自將孤不敢尚盈泰矣吾父敦仁能愛孤
不敢居苛薄矣吾父笑顰加惜孤不敢同非族
矣至若鶴鳴子和前于後喁片語之妍鼓掌而
共適千載之業交頤而侈譚遂使鄴侯之萬架
不虛韋氏之一經可紹嗚呼鍾子亡而伯子輟

響施子死而惠子沉嘿不言蓋重賞音之難而
遇合之尠也嗚呼而况父子之際乎此不肖孤
所爲裂腸刺骨拊膺雪泣而繼之以血者也孤
亡恙而吾父已矣垂白之母煢煢在堂久寡之
嫂哀哀在室黃口之弟嗷嗷而在襁褓孤亡恙
而吾父已矣嗚呼痛哉茫茫宇宙靡有涯際牛
眠何所馬鬣難期吾父田宅不逮中人之產爾
其事若殖其費若遺恐或一旦乏鴈鷺之餘食
以辱其先人此皆不肖孤所爲日夕寘念展側

而不得已已者也嗚呼人有七尺之軀而不能自理者非夫也且宇宙大矣豈無坏土足以卜兆哉卽不肖孤日夕寘念也吾父可無念地下矣嗚呼吾父之考終也託指于逍遙達觀于歸盡誠謂徹性命而了生死者矣而所支枕而貽訓不肖孤者遵王制之文篤謙終之吉兩事耳所屬於不肖孤者撫幼弟一事耳嗚呼頭髮未星馳驅有日禮畀如地三命循墻孤平生慷慨義不負人父子兄弟廼何人斯胡必銜血於口

授帛于篋而始見信乎嗚呼行其庭不見其人
失所親亦失所因恩則昊天其罔極而痛則終
天之莫伸嗚呼吾父既往者形長存者神不肖
孤幾死者身不晦者心崇肴醴酒涕雨其零抑
惟吾父之式靈嗚呼痛哉

除夕薦先太中大夫文

嗚呼今何夕哉歲以除矣吾父何適哉五旬而
餘矣孤何心哉淚如縷縻矣當昨歲之今夕也
言返故廬卮酒爲壽愛弟携左豎兒負右此豈

不融融而洩洩哉當今歲之昨夕也誄詞衣壁
靈輦陳堂弱子憑地而崩角嫠母呼天而徬徨
嗚呼爲時幾何哉而死生永隔歌泣殊方追惟
甲戌之除矣孤爲詩自嘲而吾父倚韻示答孤
復有以獻焉驩甚也不三載事爾而今吾父吐
金石之聲使孤答警欬之音也其可得邪其不
可得邪嗚呼孤有求而弗得矣始理家政逋責
踵門歲費不貲日入不繼人亦有言父死之謂
何又因以爲利孤不肖敢有異心詩文命梓輒

已就緒季弟姻婭業有成言今海內文人不數
屈指銘傳之屬其無當者孤必不以辱先人孤
不肖敢有後心吾父之啓衾而訓孤者耳猶溫
也出而磬折入而三緘抑其狂心料及故業洋
洋在上精爽是依孤不肖敢有違心嗚呼痛哉
春事居然朋舊儼在孤髮漸長親養不待嗚呼
椒漿御矣楮柏虔矣稽顙而後拜吾從其至矣
卽魂通于寤寐而言交于冥漠也其何益矣

鹿裘石室集卷第二十四終

鹿裘石室集卷第二十五

宣城梅鼎祚禹金著

文

祭文

祭查太恭人

於、嚳恭人金相玉質敬惠若慈柔嘉維則天定
厥祥爰歸鴻碩宜于而家儀于爾室廼虔蠲祀
于采蘋蘋迺賓舉案如鼓瑟琴有終克代無遂
用敦旣曰婦順亦曰女貞徽音孔昭以燕翼子

厥子伊何王之卿士慧秉天聰文絕地紀對揚
在廷晏喜在里始奉三尺爲天下平帝曰
卹哉惟刑是欽情申聽石照及覆盆禮賢繫襪
卜世高門趙得寶符寔登三輔五馬驂驪叢臺
之下威則嚴霜化則甘雨不戒以孚式歌且舞
陟明黜績憲淵是遷惠文彈治畫軌巡宣臣曰
母聖帝日子賢流以原達海則河先翟茀斯
煌綸章有赫投劾奉輿驅車回策服綵翩翩
調甘洩洩爲樂無方問年稱臺占彼嫠女倏匿

其輝睠彼宜男忽瘁其瘳彤管方御總帷已施
雖燉全昌曷旣孝思某管業膠庠橫經函丈翦
紱將前騰驤冀上竊領度支主臣無狀量移名
邦悅親舊帳升堂拜母而母不存公心在疚我
居匪寧不腆者奠不斐者文令問未殄淑靈載
歆

祭吳太孺人

噫與麻哉其太君乎疇不有配配則光祿胃衍
神明道存適軸堂構弗隳式女以穀僉日令妻

副車則轂疇不有嗣嗣則汝州佩履倫物枕藉
墳丘駢駢五馬亦莫不適冥冥飛鴻亦復何求
僉曰聖謚布鵠於侯疇不有年年則望耄純嘏
自將德音孔劭爲珈爲笄是則是劬樹背忘憂
介眉載笑旣壽且臧懋章陰教疇不有死死則
能哀總帷倏故翟第中摧令聞非隕身度罔諧
春相輟聽彤管宣懷淫淫肆涕姍姍其來嗟夫
都盧骨肉電泡生死居者縣流行者反始矧伊
太君爰受多祉樹德允滋施于孫子自天申之

振振宜爾適觀厥成僂僂歸矣余曹無似寔繁
有親或結之禱或綰之襟晏然中堂聞其無人
承諱匍匐薄言傷心睠鼎小子什百其情人亦
有言同病相憐歲之仲冬北堂告捐吾母若母
太君儼然爲時幾時太君及馬撫今錯愕籌昨
汎瀾嗚呼白日徒昭青春受謝飛旄飄遙輶輶
效駕眇慌忽其焉如愴靈修之數化沈盎齊以
旣和庶其棗回風而上下嗚呼悲哉

祭馮孺人

嗚呼弓疆于弭衣紉于裏人亦言之靈其庶只
作嬪右族洵美且都章嫖以忽夫儼焉孤南山
有田北堂有母春酒旨甘以介眉壽路樹成社
家食鳴鍾旣潤爾室用譽厥躬或興內戎或藁
外侮爰利執言實惟車輔子曰聖善夫曰令妻
潛埤陰教肅眠壺儀鬼伯不仁何相催促卽彼
玄扃去茲華屋嗚呼總帷在御彤管徒宣塵封
遺珪翠委餘鈿口澤猶存步幄如見姍姍來遲
哀哀永戀繫予小子中表弟昆矧復丘嫂惟靈

女兄忝屬懿親恭承嘉惠瓜斧葛鄰芝焚蘭喟
嗚呼芳椒酌地廣柳臨塗我心則寫神夕晡虞
噫嘻

祭徐司寇如夫人

嗚呼望舒在御儷日代光亦有嫠女正色寒芒
崔嵬岱嶽諸岳之宗亦有梁父躋禪於封粵咎
瀉汭雙降軒轡四妃物兩大則曰耦盛有開必
先之於惟夫人昭哉景胄美孰與徐公來嬪左
右公也蓋臣義不內顧以翼我主君式壺儀於

度主曰覃葛我曰采蘋主曰鷄鳴我曰蟬聲或
掎或角一緯一經勞有猷殫道無專成當徐公
之把蕭斧而詰戎也則主君翟弗而請息曰于
邁咨爾其從公吾處守而爾攝外職洵夫人之
有子適負葆而呱呱曰主君其是顧是復而吾
行者何以家蓋自有夫人而司寇公槃木之勛
庸懋自有夫人而劉太君樛木之風穆宣自有
夫人而東海之流澤增暢自有夫人而小星之
分諠益虔至若豐不僭上儉不偪下愛不忘敬

慈不廢嚴則已總挈女士之懿行婦順之大凡
又若五鼎齊牢六珈登曜聯跼接萼同心如蘭
則方希麟趾之振詠羌鳳馭以俱僊何遠跡頓
於促路而其用四十有九者筮大衍而在年豈
釋氏以世界爲缺陷而內教以造物者忌全耶
嗚呼念君子之煢煢遺佩環步塵邈矣撫孤兒
之噉噉循杯棬口澤存焉驚虛弦而墮孽鳥翳
落葉而弔哀蟬嗚呼壽豈必年垂問郁矣子豈
必繁在羣逸矣而况有離裏屬毛其儀一矣玉

友金昆其序匹矣彈雲琳於真謠託彤管於女史望總帷而暖金釭陳溪毫與澗沚鼎等忝肺附之密親承徽音之孔邇涕曷謂其無從繇之生而致死悅姍姍其何遲冀洋洋乎至喜嗚呼傷哉

祭尹令君大母

維歲龍集丁酉鳥殷仲春日纏降婁之次星紀斗牛之分尹大母金太夫人旨養方新葩芬俄謝神返岱宗僊游樊榭通家晚生某某等瞻霄

輦以靡晨驚壑舟之就夜聊設奠而嗽哀匪噉
馬而怛化其辭曰嗚呼瀛海之漚稽山之陰翔
陽舒采霞蔚雲蒸內毓邦媛外挺國禎忠移自
孝教始在庭粵先伯氏一麾作守政率上賢以
風間右伏軾清門執醕黃耆曰尹大父妃尹大
母旣稱靜好亦咏考槃饁耕賓冀出汲儷桓疆
資弓弭戒服衿輦婦順克備姆儀用宣式穀惟
爾以燕翼子世修隱操君子所履何慙擁絮盡
歡啜水積重流暉源深達委文孫奕奕翹跡天

衢願司繁劇來爲我都案勘留牘畝貯宿儲吏
負霜立民被春敷暢以弦歌兼之師保綠儒飾
治因文見道鳴琴在堂橫經在署叶千里騰嬉
四封鳬藻軸可爲相摘可爲公庭訓丕闡祖烈
益隆舞斑製錦三代同官其聚衍衍其樂融融
履吉其旋疇福畢遂大耋之嗟理有摯至翳我
令君永錫不匱翦角隱痛在心成喟嗚呼載傳
彤管待命紫泥若斧若屋是賁是綏遐不謂矣
薄言誅之發星娥月神之格思

祭尹母初太夫人

在晉和靖淵源伊洛胄衍稽山宗風式廓維越
之初顯而方嶽亦有女士幽貞愿恪蚤嫻懿誠
嫓節公宮擇嬪于尹是卽封翁兩大爲耦雙美
克隆少微直曜婺女叶從其樂孔嘉琴瑟靜好
永言孝思毳甘怡老俯勤義友仰祈壽考誕挺
家禎鬱爲國寶入對文陛出宰宛陵惠如雨
潤頌若雲蒸詎三徵異則百斯興崇祠用祝明
德惟馨帝重欽刑咨爾弼教民自不冤獄無

遺照咸歸陳父輕比是告亦曰雋母平反是報
六珈耀首加籩大烹祿養善養以康以榮佇觀
喆嗣薦陟孤卿母膺三命翁拜五更嗚呼天假
數年慶登七秩豈厭世氛而胡奄息鰥悲夜瞑
烏淒晨泣澶遙崩奔閔茲銜卹宣有兩生宰公
特知鼎則我長際則我師永錫爾類子而翼之
承諱忉怛倍其等夷噫嘻夫人人所貴年踰指
使矣人所貴名芳彤史矣所貴孫子孫卽象賢
子膺仕矣所未小釋以封翁單止而離合自然

亦可已矣。嗚呼！凡民有喪，且在扶服。我曹禮宜越阡度陌，薄誅致哀，援情負慝，神馬無吐靈兮。昭格。

祭徐少君

嗚呼！秦淮清泚，宛句洄縈。澄江如練，河漢是經。精光相授，匪天曷因。雖御專夕，實安小星。壺儀用修，家政爰董。隱豹喻文，弋鳧致咏。約以持盈，恭能將寵。奉我尊嫜，毗茲嫡冢。水折方壁，川媚圓珠。繡鸞蠟鳳，左嬉右虞。女子有行，惟子與夫。

咸曰得全德與福俱美好不祥造物多忌玦化
難完寶無宿寄方樂韶年而稱卽世據疾占凶
隔花夢涕嗚呼嗟哉比翼乍背煢煢獨棲屬毛
一枿哖哖孰依所恃王母兼有令妻鳴鳩均惠
孤雛席慈子孫在祿遂諧坦腹潤媿清水重逾
倚玉淑問永延訃音胡速哀興望帷魂來步幄
嗚呼傷者易感嗟予悼亡兒始就傅孫今列行
况如麟趾佇錫龍章靈其斯格桂蒸椒漿

祭劉太孺人

易遷學道壩城集僊遙懸域外不在人間何如
我母與世翩跹百齡踰耄諸孫迭玄始適漳平
儒而濩落姊袂雖良椎布操作啜菽承驪斷機
勸學出宰由郎居豐如約政方期可計聞本生
終喪有制心喪可行歸不待報相與克成循良
之績孝廉之名偕隱清標逍遙皓首翦彼晚菰
爲茲春酒擁絮何慙耕犁足耦介福攸同佑啟
我后一丞婺女一丞稽陰哦松並茂輝萼聯榮
七十兒嘯萊舞在庭含飴分甘母懷載馨噫嘻

多壽而臧善養兼祿維衆所歆爲天所篤有送
及厓無往不復槐夢千春桑陰一宿念母仲女
予嫂少嫠栢操允執輦訓是儀女貞子順萃于
一時悉我聖善貽厥芳規憶管成童嬉戲戶下
撫我車鳩乘我竹馬往卽親廬來猶子舍扶服
臨斯我心獨寫嗚呼敬亭之嶼有閼玄宮埋此
雙玉樹之孤桐卜云其吉望之若封人間自有
金母木公

祭蔡恭人

噫嘻女孰無夫恭人之夫洵美且都寅清建禮
執憲海隅回翔紫薇依約蒼梧爲朝維翰爲
世大儒婦孰無子恭人之子振振麟趾陳留名
胄高陽表里太學人倫周庠造士溟北鵬搏河
東鳳時人孰無終恭人之終榮哀備隆芝泥綸
寵柏湊斧封訓垂幅畫光煒管彤女宗靡適閨
範曷從於嗟恭人爲天篤祐受茲介福亦孔之
厚所悼小年未躋中壽生固有涯死宜不朽嗚
呼世界缺陷造化忌全鸞影孤照雞鳴獨賢蔚

然庭桂萎爾堂憲澤存杯棬聲遺珮環某等繆
締嫺嫺夙叅年諠疚若在躬悲來曷旣頽雲暮
凝朔風寒厲執紼行歌祖筵雪涕嗚呼噫嘻

祭韓母武太孺人

高陽華胄左輔隩區望衡對宇合德齊驅星輝
聯壁川媚含珠徽音載誕奕葉永敷晉我世父
考終婺守憩頌甘棠車廻廣柳伯也先鳴公乎
驤首惟孝友于令妻壽母天其不弔戚在孔懷
原鵠急難巢鳳孤頽屬毛離裏翼子于孩內釁

旋弭外侮以諸公領叅軍運籌帷幄東虜羈縻
北門鎖鑰職贊中閨威宣大漠雖無攸遂亦勤
遠略公游已倦歸不待年居然椎綳操作而前
有婦偕隱有子象賢興哀鸞鏡茹苦熊丸之子
伊何翩翩快士希聖心齋博文腹笥三物作賓
一經傳世歲甲旣周祖風克嗣咸曰聖善如臨
父師大廷賜對以胥後期雲呈魏國斗仰昌黎
食而能教孚用厥威愛日承驩紀辰始艾綸命
方徠金養不待蘭惜傾暉護嗟樹背家秉初遺

壺儀疇賴。嗚呼母慈而訓。婦安且貞。旣挺喆胤。
兼睦諸昆。所未親覲。含飴弄孫。神其衍衍。趾必
振振。鼎等繆忝。嫺嫺。夙忝年誼。承諱魂營。經時
病廢。大事聿襄。薄言申喟。束帛崇蒸。靈昭不昧。
祭五從母

嗚呼母歸徠乎。卽次榆枌。東征逐子。南紀是經。
生於宛陵。歿於秣陵。二陵之間。亦旣有徵。肇修
公宮。嬪于我叔。夢應燕蘭。風追樛木。伯仲先鳴。
塤箎雍穆。嘉誕自母。琳瑯觸目。叔尉在梁。母則

居守徵錄養廉課桑力畝。叔徙河澹，母則山口。
仰取俯拾，林原川藪。嗚呼！始勤贊治，是爲令妻。
用財自衛，素封與期。受謀貽穀，是爲姆儀。四珍
薦起，聯萼爭暉。健翮凌秋，方圖鵬舉。何意搏扶
終違，陟屺榮悴有時。聚散恒理，而况母齡且踰。
指使嗚呼！尤苦熊和琴悲，烏泣月冷，機聲霜殘。
履跡母以子榮，率由內德，佇待芝綸寵光。綸
狄鼎祚等臨風敬弔，扶服有喪。孔懷共戚，我心
則降。副以薄誄，桂蒸椒漿，惟靈格只。淑問不忘。

嗟哉

祭一從母

嗚呼婦必有夫孺人之夫富行其德善積厥躬
望門息諍表里名通詠歌不輟先王之風母必
有子孺人之子駢蕃競爽就業成均潛修間黨
一門八龍內潤外朗奕奕文孫風氣日上孰不
祈年孺人之年大耋屆期鼎亨隆養珈服是宜
鸞停鵠峙川媚山輝魯侯壽母燕喜稱詩孰不
尚賢孺人之賢壺范允廸其子七兮其儀則一

教悴熊丸義勤鴈弋婦順姆慈無疆貞吉嗚呼
永終者譽有涯者生棄化歸盡神虞以寧彤管
旣澤芝泥待榮庶僊憑乎籥雲上征鼎祚等敬
老近親釣情猶子言樹萎護餘芳挹芷共寫哀
悃薄陳沔醕洋洋靈淑亦云降止嗟哉

祭唐外母陶恭人遷殯

嗚呼孔子垂涕于爲防曰修墓非古也二妃不
從于蒼梧曰合葬非古也而况遷殯乎中古以
後則理有所必然而情有所自致者當我母恭

人以年二十七歿一女婦予鼎祚者三齡耳明年而外舅嘉議公成進士既卜葬竹塘之禪墩矣已以爲地庫濕欲遷者亦數矣顧什九宦于游終未果逮今幾五十年而施恭人之伯子始克遷以祔嘉議于芳山遵先志也世固有後母子而諱言前母者或庶生子而諱言嫡母者此自以爲崇其母而不知適以夷其父彼非與父敵體哉然而異其所生則異其所親人情也事遠則易忘事危則難舉人情也若唐伯子可謂

孝矣予幼不及見恭人而唐氏長老言恭人伉
儷甚篤然賓事嘉議不以私燕廢莊也嘉議少
孤事兄如父事嫂如母恭人不敢以姊姒進也
若恭人可謂順矣母順子孝天之經地之義也
而伯子又少孤幾五十年含卹服勞事始集于
理協于情周亦足以風薄世矣予小子來蒞喪
卽不更爲烏烏泣然而嗟咨慨噫愀然以傷則
以母恭人旣短造女婦予者復無出是中外不
延一綫也而又拊髀抒臆稍驪然以幸則母獲

從嘉議公與施恭人相左右衍衍翼翼也予有
庶生子當不至諱言嫡有孫且長是卽母胤爾
母可用以自慰藉矣茲予率子婦若孫以不腆
之肴醴醑恭人母恭人其無吐而洋洋昭格乎
五十年如一日也嗚呼

祭姪女

嗚呼傷哉汝死矣而余涕若濡哭之痛實多今
昔之感焉蓋伯兄短折而未有息嫂劉卽矢志
無二以其弟之女爲女則汝也是時余年甫十

六又二十餘年而始以第二子嗣伯兄汝出字
吳者方三載當其女先太中母恭人而下靡不
以爲自腹也汝蚤慧純順亦自以爲腹我也精
女紅慎容止旣稱賢女矣及其婦而事繼姑如
其姑相夫以勤于學而儉于治生內之旨蓄外
之樹藝皆本其經畫且置媵于其夫則旣稱賢
婦矣夫餘善有慶安貞無疆是于理宜壽迺堇
堇三十八以死耶或謂天道猶酌約此必豐彼
汝劼据朝夕未有一命之榮五鼎之奉也三女

非益單子復殤其取之天者亦太約矣所豐意在年而廼堇堇三十八以死耶里俗以生而支干與骨相法不得長者輒乞養爲他姓子以禳之汝亦旣爲宅姓子矣奈何年三十八以死耶夫質之福德之理無徵叅之盈虛之數罔驗卽里俗藁譚謬悠而已更何所援以解耶事至于無可援以解而涕濡不止哭之痛情則然耳嗚呼傷哉汝性爽朗無女婦戚促沾滯之態然其病也初以哭殤子而數歲未有子病漸以深西

河之過東門之達則汝所難辨矣臨訣言不瞑者二事一則未有子一則未能終母養也嗟呼孝乎則汝亦無可自解矣嗚呼余猶有持以解汝者余累生女長者年十四頗孝幼者且七齡而悉成殤安及汝有家與嬌女愛婿之駢列年兩倍之乎且汝訣而四分其服飾殆將以遺其子則汝固知若子卽汝子也汝母之養有汝弟可代也汝瞑矣汝瞑矣况汝之不得長者年其可得長者賢人貌榮名寧有旣乎今以牢醴醑

汝也以申余無可解而以慰汝有可解者嗚呼
依然痛而涕濡不止也惟汝有知其歆格斯傷
哉傷哉

祭許太宜人

嗚呼太岳神明滎陽清淑我耦孔嘉爾式厥穀
申 命顯顯祗載恭服得九齡焉受天之豐福
粵贈奉政實肅典刑韋韋薦世而儒其紳農蓁
在畝賓屨在庭曷以襄治則太宜人是任肆誕
令子俾司牧宰百里梁鄒表自東海以承于括

令問藹藹攝守真守一德無解民曰予康帝
曰惟良再言酌庸朱芾斯皇母氏聖善綸綍允
章安車陪鼎則太宜人是將耶生有言六百自
免守二千石曷引而遠母噫謂子吾逐女返旣
不待傳亦不待滿嗚呼子歸闢園于郊于野庶
奉板輿何希駟馬廼期有必至時乎弗假瞻漢
遐登臨風哀寫鼎等諡泰猶子戚屬嫺嫺所冀
壽母則百斯年所爲祝子則百斯男薄陳明水
用慰下泉

祭徐孺人

嗟乎嗟乎吾觀孺人廼益信得天之全之難焉
孺人父大夫而室于大銀臺之冢孫仰宜于尊
嫜而俛協于夫子不爲非遇性婉嫕而材周敏
敬共所事耦俱無猜不爲非賢凡數十年中繇
公宮以建主壺雍容嫺雅蓋無一事之不適繇
女道以及母道惇睦訓蓋無一美之不聞固
孺人之姘修自有之而其所得于天者亦云厚
矣然而卒不獲有年夫器滿必覆華盛必擿要

非可以常居而重後則輕前此羸則彼詘殆天之所不易全者乎卽其夫之顯與子女之婚嫁成立有日皆不及親遘焉是以百日勞而不饗一日澤也爲之夫若子又安得不腹悲而心腐邪凡親戚之臨于斯者亦未嘗不齎咨歎噫爲之疾首酸鼻以其賢而無年爾而余父子猶倍之則以孺人子爲余孫壻也行且送女矣董越歲之期而竟不獲奉孺人一日之養它日徒僂然儼然依希想像於几筵俎豆之間亦未矣嗚

呼齊義穆姜之爲慈虞閔姜薛之爲孝世豈多
見哉夫孤者易感情者易暱此傷秉之所爲稱
不惑而王駿致慨于曾參者也從道賢人也亾
豈易存必無負孺人孺人抑可宴處冥冥矣余
子九歲失母雖幸有撫之者余爲懷良苦其女
爲人媳又未及廟見而失姑故茲申祖奠于孺
人也益歎歎不止爲物薄而意獨至已嗚呼

祭吳母

嗚呼人言之不知其婦視其夫不知其母視其

子廼夫人不然聖善在已彼反有以籍乎此而
名以起當汝州公爲守有嘉問以微疾解去也
蓋決於夫人之一言遂獲賁於丘園而考終於
相里及二子之長也汝州公頗著愛不甚勞而
夫人嗃嗃厲學俾其儒者行而君子履大氏健
婦持門戶勝丈夫而母道攝父道以共致之理
昔所謂衣物於裏弓疆于弭令妻壽母亦旣燕
喜夫去留旦暮固事之恒耳矧夫人之存則順
而亾則救然夫人身後之福澤被及伯子者能

使其有翹薦而不能挽其無壯死吾何惜鄉失
一舉人而深悼世殲我良士猶幸難弟振振以
嗣升諸孫繩繩而濟美庶酌汝州之未竟實受
夫人之餘祉嗚呼敬亭之陽宛水之汜祖載有
期吉壤在彼合璧永藏同穴是矢吁嗟乎夫人
僊僊歸矣咎從汝州吾少也鄙忘年爾汝通家
孔李締交三世嬋姻伊邇茲預執紼之列也吾
于夫人無遺憾而終傷伯子之違侍靈几託誄
谷蘭薄噉澗芷吁嗟乎夫人靈其格只

祭張太安人

嗚呼人之稱親必歸厥子殆彼蚩質無一可紀
繫公夫人敬修自己廼子以紹明世而昌胤緣
于濟美處約能久在醜不爭寓形塵市濯魄清
泠山中達外藹藹恂恂奉身拱璧還客遺金爰
有婉儀而備內輔我尊我章我饌我酤滌滲之
羸更具挺脯以慈代嚴實式穀女策名天府起
家地曹卓爾大雅嶠然孤操司臾則拜司權則
逃辭富居貧跡邇心超伯兮及仲墳簞迭奏奕

奕文孫就養左右仲贊郡寮于閩西埃無祿卽
世伯亦孔厚於赫綸命用賁幽玄存雖不建歿
餘榮焉世非乏貴季則獨賢直維頽俗庶砥狂
瀾予猶恫心士喪禮壞翩反公閭衰裳素葢歌
弦潤耳置酒高會亡禮之禮惟季是賴噫嘻貽
我二人令名無窮仰有王言俛有輿頌叫漿椒
烝桂以酌斧封闕茲雙玉萬年斯宮

祭孫孺人

噫嘻凡宗之興率繇內行婦不貴才良非定論

至靜而方用健輔順漏卮難填處脂得潤母胃
清華系本谿南擇嬪于孫兩大耦焉度閣必親
錡筮克虔我生我嗣咸以承歡緬惟太學務施
好客淋漓尊酒芬芳薌澤咄嗟立辦方圓靡闕
命出中厨悉從母畫外禦彊侮內俶餘貲雖速
我訟亦不我遺式微復振廣譽交馳言不出閫
實母佐之才信足徵行敦孝睦中道背蜚太學
無祿以慈代嚴既富方穀有采翩翩有儀肅肅
文孫令子吮墨分甘爲此春酒以介耆年方期

燕喜遽卽幽玄賀門弔閭理有固然鼎等夙締
姻媿嘗叅世講伯仲與游斐然吾黨祖載在斯
送車百輛薄言申奠噫嘻尚饗

祭韓母陳宜人

嗚呼太夫人之所尊非易尊者也前固有尊之
而違者矣而夫人迺獨有以得其歡稱賢婦焉
太夫人之所儷非恒儷者也前固有儷之而離
者矣而夫人迺獨有以宜其室稱令妻焉太夫
人之所撫非已出者也旁且有睨之而携者矣

廼夫人卒有以底于成俾其子爲世名儒其稱
母慈而惠焉凡以其身置先後俯仰之介者十
數年復以其身歷孤嫠艱阨之際者又數年而
太夫人自如也至于誕膺載命之榮備享志物
之養以登于七十餘年繇衢州公之胙以蟬聯
輝赫永孚於休者殆不知幾千百年而太夫人
自如也夫夷險一致終始一節順時達變審幾
握衡此卽偉丈夫詎臻乎頃者鼎祚拜文學君
之屬爲太夫人狀而大司成誌諸幽銘諸石以

爲爲人婦及妻與母之軌儀倫式者亦旣班班
可徵矣嗚呼茲月維良彼土孔臧陳武之岡夫
人是藏予子暨孫忝在甥行感壺德之貽蔭襲
宅相之餘芳陳薄筵而致祖固我戚屬者之常
耳若太夫人則已與化游而精氣無乎不昭格
其僊僊而洋洋者耶

祭黃母周老夫人

嗚呼睢水之陰商丘之陽澤深土厚挺秀毓良
少微叶象婺女騰光天與之合人定厥祥於昭

太母特秉醇化胄衍宗周出嬪江夏推布操作
鉉華告謝以翌贈公衡門之下龍德弗曜鴻羽
用儀我負子戴偕隱齊徽蘋繁采采織紵絲絲
食而能訓孝且篤慈眷茲家珍蔚爲國寶殖學
濬淵敷詞成藻桂苑掄魁蘭臺獨矯讜論霜嚴
丹心日皎行行驄馬攬轡三秦百城震肅八水
澄清金鵝交貢銅爵雙鳴迺移憲節緯武經文
南輔隩區陪京豐芑 天子曰都往訓多士水
鏡是司王衡式履軋茁回風條貫有紀僉曰聖

言代父教忠儷美前世買彘九熊皇綸有赫
亦旣崇封珠圓璿折源所攸從噫嘻桃李盈門
庭護萎養絳帳方懸總帷遙望扶服徠歸衝颺
破浪凡及宮墻夷猶悵快噫嘻夫也孺仲擁絮
稱賢子也永叔瀧岡表阡康哉且壽昌以得全
鳳珈覲珮翩乎易遷某諡忝通家職羈官省靡
由執紼徒勞引領絮酒束芻聊申耿耿托辭微
波惟江之永

男

士都

編次

鹿裘石室集卷第二十五

終

出曉男士好

編次